

四庫全書

集部

欽定四庫全書

篁墩文集卷九十

明 程敏政 撰

詩

甲寅元日齋居次韻倪舜咨宗伯

五十悠悠白髮新
北來俄及帝城春
天人有慶占豐歲
郊廟相仍卜上旬
客刺暫勞停左顧
頌聲長恥勸東巡
明時事業夔龍在
願守遺經候紫宸

四日早聽郊戒復陪廟享次韻李賓之學士

衣冠晨立陞西東有詔齋明對竹宮
鷄序復從陪裸享
鷺旂早已動靈風
五門晝下銅壺轉
九廟春回玉輅通
聖敬未遑先飲福
南郊三日待升中

時禮官議郊戒
免飲福之禮

五日左順門賜金織雲鴈紵絲緋袍

君王將出事郊祈
朝罷金門召賜緋
手奉印緘鵷作序
胸盤雲錦鴈交飛
五紵但擬賡周詠
一字何能補舜衣
明日齋宮同入拜
圜丘春日爛相輝

七日南郊分獻天下神祇壇次賓之韻

漏下齋宮夜未分
長林風起散氈熏
百靈受職扶元化
上帝端居隔朵雲
扈蹕軍容香霧遶
登壇人語半空聞
十牲載俎終三獻
想見明明格異芬

八日宴奉天殿與亨大祭酒廉伯學士聯席

大廷開宴慶郊成
玉輦來臨自武英
拜注金罍先上壽
坐粘紅紙預題名
仗前舞戚天樞近
墀下鳴鞘午漏平
同榜幾人聯席在
感時圖報若為情

題屠元勲大理鏡妝蠟梅

調鼎應須幾鍊金
蜜脾先沁玉容深
寒香瘦影無尋處
忽在詩家曉鏡心

飲林亨大祭酒家觀閩燈

化城誰測暗中機
南粵燈工北到稀
蜃市曉乘千疊浪
蟾宮春換六銖衣
弩窺伏道朱旗閃
車簇名園錦障歸
入眼未真先告醉
却疑東壁坐騰輝

和屠都憲朝宗止酒之作

酒兵一日破重圍
讀罷初筵愧昨非
親近藥爐新病作

生疎芸簡壯心違衆酣轉覺官宜禁我戒寧因佛可依
小啜鳳團仍謝客心旌遙自舞雩歸

廿八日受命與賓之同教庶吉士于翰林

久塵經幄愧因仍再領羣才力詎勝命下可能堪士論
年來方欲叩師承金鑒舊契原秋榜玉署新齋炯夜燈
振作英髦明主意願歌周雅贊中興

朝宗都憲聞予教庶吉士有詩見贈奉和

玉署西瞻尺五天講帷何敢次高賢聽君句比芝房籥

笑我才如草舍椽春館晝長香篆續午城風起漏聲傳
詩書願附燈窓業不為身期食蠹仙

芸館初開二月天詩郵來自栢臺賢人才盛喜鵷成序
歲律忙驚燕寄椽學海有航思共濟經畬無本愧家傳
錦囊收拾珠璣在佳話應留滿集仙

送徐中行進士赴青州推官

城南芳草路東西野寺春盃惜解攜官小暫淹名下士
才高曾賦御前題手繙案牘仍兼易句寫山川直到齊

舊館為誰重下榻待君他日聽朝雞

送翰林庶吉士許啟衷南歸

許君青雲彥進學來玉堂居然五色毫掉鞅翰墨場何
緣忽抱恙荏苒六月強云有二老親鬢髮驚滄浪恨無
千里鵠載我天南翔瀝懇夜具疏頓首陳明光邇來得
賜告暫返閩中鄉官舟趣行李禁柳搖初黃相別城東
門立語春風長巍巍紫陽山渺渺雲谷莊就中吾與子
共致一瓣香子行日已遠山川鬱相望仰止聖謩在莫

遣心田荒家慶樂無已人窮安可忘芸窓遲子歸尋源
漱其芳一水繞屋流雙栢凌空蒼平生四方志及此歌
明良

和答朝宗都憲問難之作

寓言媯石本誣天名教先應罪七賢吳斧可當新月鑑
秦灰那復故宮傳鳳簫久慕軒皇奏鴈札曾因漢使傳
紫府列銜吾未敢官曹無事即神仙

弭災惟敬莫呼天牧愛無方首薦賢未暇王田論畝畝

可憐民瘼及懷柔休論協本箕疇在異學衰因孔教傳
千古鑄顏真鍛手紛紛流俗漫師仙

次韻艾武選奉使朝鮮卷

薰風笳鼓出皇都爭說官曹本上樞關外兵車迎漢節
海東文物紹箕圖青宮位正嚴宸左紫詔光臨絕塞隅
胡越一家覃化久不須重譯問前途

使槎行處及芳時陸海爭先覩鳳儀郵傳直過平壤道
祖筵何必渭城詞受金使者應慙賈佐省名郎却重綦

屈指定知歸日近馬蹄沿路看辛夷

兵部郎中艾君德潤嘗奉使朝鮮有留別之作今年矣當時和者已衆而德潤亦欲得鄙詩因奉卷以請予素重德潤之才器遠到其可詠者不特奉使一節因勉和二章如右宋內翰綦公崇禮嘗為兵部侍郎其所建禦戎弭盜之策甚偉因援以入韻少致期望之意云

贈僉憲李君宗元赴河南

一官分印佐提刑祖席遙張郭外亭
多服家聲推右隴
皂囊風采播東溟尊前宿靄花爭艷
馬首春風麥正青
河洛壯遊知練達不勞隨路問圖經

題尚書葉公捕魚圖

叢蘆岸側青谿灣石磯淨掃苔花斑
漁翁有家住何許
風景却如西塞山昨夜谿頭過新雨
春水漫漫決沙渚
羣魚盡逐早潮來父起收罾子看筥
入市魚租今幾何
歸家尚喜鮮鱗多近村沽酒了餘日
醉後不妨眠綠莎

古木垂陰斷岸脚疑與是翁曾訂約摩挲安得其盤桓
細和江南捕魚樂

送汪微之縣丞赴官蒲圻

故宣德進士戶部主事益謙先生之子

幾年場屋滯賓興一日銓曹次第升畫舫官河行處好
青山鄉思望中凝花間莅政時參尹松下哦詩不負丞
珍重舊家文獻在擬從湖北聽佳稱

林良二畫

青山半壁垂藤陰南陂水滿菰蒲深非鳬非鷺見雙鳥

上下嘒嘒鳴春音石飲林棲無繫著老去畫師那可作
虞人弋子漫多情秦養能如寫生樂

斷崖風急鳴枯楊回谿沙白蘆草黃羽毛縱橫各有適
顧影似愛秋原長此本誰當百金售畫堂彷彿聞清味
老隼蒼鷹不敢窺疑在洋洋古靈囿

雪窓蘭

誰將幽韻瀉朱繩贏得風神寄野僧澧上國香還幾種
欲鈔花譜問零陵

送史主事

一年分省近江鄉不似親庭隔太行咫尺家書傳漂潁
東南軍食重淮陽天恩早下金華誥士論原歸粉署郎
春晚送君頻注目落花隨棹楚雲長

地官主事史君文鑑世家漂陽而出總庾事于淮上
有便道省親之樂言別于予予受命主考南畿文鑑
實在選中今九年矣喜文鑑功名日新而予之不失
士也賦此贈之

寄題蔣令君瑞芝亭

槁木中宵紫氣生天開佳兆動山城
纍纍不止榮三秀節節真堪配九莖
羽客四求空按譜多冠頻謫更知名
洵陽百里甘棠地徵詔何時出帝京

同年友蔣君克明以御史言事被謫三徙而名益著
其後令陝之洵陽有紫芝產其邑東空樹中雙幹並
出其蓋突然若指者百有餘朵視世所見不同蓋真
芝也邑人咸慶以為異政所致邇者君以考績至京

獲語及之予意君遠外已久將有懋恩嘉命以酬宿
昔而此芝實為之開祥也因賦詩奉贈用取驗于異
日云

竹鶴老人山水

谿風吹雲繞山腹上見青山下茅屋誰家亭子據潺湲
中隔板橋烟樹綠野艇悠悠來磴阿晴沙白石灘聲多
幽人不喜問奇字扣舷一曲滄浪歌

沈石田小景

雨晴山麓上莓苔老木亭前晷畫開
城市愛閒應更少
水邊才見一人來

畫菜

嫩甲纖纖浥露青
小齋終日候園丁
不知春到先紅紫
幾處爭開擇勝亭

畫鷹

當潮
獨立

一瞬青霄萬里風
草間狐兔幾回空
不知斂迹驚濤裏
却是千人百購中

和答鄭廷綱通政

銀臺名重兩京傳三載功高翰墨筵南去地瞻鍾阜近
北來人仰鄭公賢推恩喜奉回鑾錦贈別思臨洗句泉
多士只今窺大業肯從江海計流年

雙鳳篇

大鳳先飛上丹闕小鳳隨飛出丹穴皇家結網未全疎
入眼平生兩奇絕春風遶羽驂龍翔文章五色明朝陽
鵷班共指不易得舊家似出三槐王清味時聞起阿閣

和氣還應叶韻
籥舜文有道致祥多遠陋西京奏神雀
垣竹枰梧高入天
喧啾百鳥空茫然
願加自寶奉明主
聽取人歌雙鳳篇

濱郡王君朝吉舉丁未進士歷戶科右給事中
以正言履行有聲
瑣闥間其弟朝儀復舉癸丑進士授官
行人有如昔人所謂二惠競爽者健羨之餘為賦此
篇

西垣對雨有懷羅明仲祭酒用舊韻奉簡

風回午枕夢初驚
雨促苔花繞砌生
牆角鳥喧黃屋靜
樹頭人愛綺窓明
紅塵不了真無計
白髮相尋似有盟
忽憶舊遊江海隔
一生知己大司成

九橋書舍為京學教授莆田陳君叙疇作

叙疇父嘗

作書舍時司冠彭公父為塾師司冠記其圖庄甚詳

十里莆南竹樹村
九橋精舍太丘孫
衣冠屢報看花捷
水石疑留洗墨痕
聘士高風今入畫
尚書經學久專門
寄言莫墜藏修地
白鹿遺規可重論

郭熙雪浦待渡圖為楊孟瑛主事賦

郭生寫山名一代平遠蕭然有餘態觸目誰傳雪浦圖
畫苑風神宛如在飛瓊勢壓凍嵐空疊出數峯兼粉黛
傍巖古寺隔西崦鳴玉淙淙得奇愛聯羈恐是採梅者
何處山村酒堪貸石梁歛仄氷在地躑躅小童如不耐
前行候渡立沙尾掉手野航呼並載江空鳥絕樹號風
一色乾坤四無礙澄谿何必剡中路高興未孤思訪戴
李成弟子凡幾人三嘆郭生今不再湘纍拂拭重懷古

清景無邊句難逮

送平江伯陳公奉詔治水張秋

薰風鏡吹發連艫入眼驚濤化坦途令肅河防新鑄印
功成邦計舊分符世家不數鄼侯傳幕府長披禹蹟圖
寬取聖憂歸及早可容旌節滯江湖

八角雕花旛石一山餉暄東白善世

雲根誰鑿鑒經幢流落真同客異邦幾見白蓮馱象馬
却埋蒼蘚混珉缸三生夢覺詩仍在八角盤堅意久降

捨贈幸逢東白老看渠磨拭對禪窓

泥金蘭蕙圖

一幹一花香出塵一幹數花香襲人幽花本出山谷品
國香何似沅湘春高潔稜稜石為偶清籟蕭蕭竹為友
草間荆棘短且疎去取疑非畫工手云誰愛作泥金披
為重此本千金宜谷風習習未見採古意只有焦桐知
供奉門庭淨于水圖史如雲集書几無言相對此同心
粉黛從人寫桃李

侶大器亞卿約賞葵于北城

聞說薰風會計軒蜀葵開徧錦雲繁濃陰更可消炎暑
僻地誰能絕市喧載酒幾人來北郭聯鑣一日下西垣
知君無限傾陽意不羨閒花種滿園

翰林公署偶作

回廊寂寂鎖齋居白日都消病歷餘竊食大官無寸補
綠陰亭上勘醫書

閱諸吉士會簿悉注病假所餘者吾兩人耳獨坐偶

成一絕奉簡西涯寅長先生聊發一笑時五月十九日

送馬謙貢士赴許州知州

中州名勝亦西湖喜奉新恩領郡符五鳳久徵循吏傳
八龍誰復聚星圖白眉異表真才子綠髮初銜已大夫
聖主憂勤嘗旰食一方民瘼待君蘇

衍聖公自曲阜載奇石一由至京相餽詩以謝之

尼山分劈小崑崙千里航來秀可餐續譜正堪題雪浪
呼童頻為洗雲根摩挲未了平生癖斧鑿疑存太古痕
荒圃自今增勝槩一詩先謝素王孫

送釋方策住善權寺

上剎新聞住辯才一舟南去水如苔再傳衣鉢詩宗遠
終日溪山畫障開草沒仙人燒藥竈花明丞相讀書臺
病夫久欲捐葷飲春焙還能數寄來

宜興善權寺山水佳勝號東南巨擘之境今講錄雪

厓濟川公嘗居之邇者其嗣孫方策長老復領札以
往來丐一言予與雪厓交甚久凡吟筒往返皆策任
之而策亦嗜學工書年少有志必能為此山主無忝
厥師因賦一律道其行如右云

題張師夔畫

沙洲閒寄野航輕山郭遙通石棧平安得倚筇松下路
共憑高閣聽谿聲

哀靈椿卷為徐中行賦

雞絮香殘劍影空一杯遙隔帝城東夜深自有招魂些
樹脚川聲樹杪風

墳草青青歲月多獨餘庭樹影婆娑他時結綵纏修榦
重續徐卿二子歌

謁陵承西涯翰長有詩相餞次韻五篇

道中作

北郭詩筒走置郵風光長為客遲留連村歲稔雞魚賤
故國城荒鹿豕遊水沒斷村驚舊雨蟬依高木戰新秋

青山久別今重見一笑還能識面不

甲辰歲與子陽太史同行今十年矣感舊作
歲華忙迫似星郵霜入吟髭不少留三日倡酬曾滿紙
十年離合幾同遊方難却老思醫扁學易隳功感奕秋
佳話不知殘暑退清風能及故人不

宿劉諫議祠下作

百歲浮生一傳郵重公英譽到今留人間虎榜真多愧
地下龍逢可並遊孔廟作隣庭檜晚唐宮何處井梧秋

得開祀典須賢令能有封章達帝不

連日憂雨作

黑雲成陣作詩郵不得荒城半日留嵐黛有情隨面出
雷車無定繞空遊道傍喚轉林鳩午風外飛餘石燕秋
寸寸入山驚雨意友人還及念予不

謁陵後喜晴作

來往濃陰若遞郵晚晴無復片雲留山呈玉筍凌空出
水幻驪龍抱月遊奇事我逢三日霽賞心天賚一林秋

歸途為問朝陵使曾有新篇紀勝不

送王懋倫僉事進表還四川提學

雨露恩通萬里天
喜隨羣牧上堯年
文章舊業餘三館
絃誦新聲徧兩川
壯歲幾人先服豸
清秋一路早聞蟬
賈生不久還膺召
為子長歌解劍篇

送常州府知事邵智之任

一舟南去渺征鴻
秋意才看到井桐
恩向楓宸分湛露
仕從蓮幕引清風
酒盃餉客驅馳裏
詩券還君邂逅中

喜說晉陵官况好簿書清簡粟陳紅

賀徐原一亞卿得雙生子

畫堂俯通達佳氣日葱蒨襁褓忽雙生彷彿蚌珠見憑
誰分伯仲婉孌如一面主人廊廟姿慷慨濟時彥及此
熊羆祥那覺鬚絲變昇昇騏驎種采采芣苢眷坐令閨
閣家遠邇一驚羨紛紜會湯餅簫管動庭院末由充賀
賓追逐叨一麵為賦瓜瓞篇迂遲笑衰倦

承出示兩郎如玉芝駢秀令人奇愛不已因賦小詩

二十句奉賀雖不敢比西涯寅長之高詠善謔亦姑
用續貂以少見連綿之義云爾

送通守馬金進表還廬州

金侍讀
廷用子

才看謫宦出京畿早見來朝自合肥上壽喜隨瞻舜冕
娛親魚得試萊衣中天雨露常時降南國山川幾日歸
記取一番新去住離亭蟬咽井梧飛

黃子久山水為陸翰長廉伯題

丹青舊數黃公望一幅溪山似灤東懸瀑自天噴早雪

飛橋臨水駕晴虹
談玄偶接蘇門士
采藥空迷鴈蕩翁
安得為絃招隱操
共憑苔石面松風

小景便面

水邊芳草綠茸長
石畔新蕉鳳尾香
滿目化機誰解領
掀髯應不為詩忙

送唐秀才還曹州

別路驚殘暑
行人發去舟
一經傳載記
千里向曹州
饌會芹宮晚
香分桂殿秋
賓鴻聲漸近
隨處莫登樓

送王德潤參政進表還河南

朝辭南去及秋晴萬歲聲齊報禮成
巨鎮帶河中土勝
列星環斗北辰明久推茂績書循吏
漸擬清班接上卿
嵩嶽正當封域裏往來多少愛君情

禮闈親薦出羣才翰苑重看蚌有胎
榜下衣冠今再葉
里中文獻舊三槐出城催上離亭宴
候館知從覲闕來
多病得誰增壯色送君斜日下燕臺

河南大叅曹邑王君德潤以賀聖壽來京師其歸也

請一言因賦此以贈德潤登己丑進士時予承乏禮
闈有一日之長近予奉命教吉士于翰林德潤之子
崇文復與焉蓋迂鈍之資實于此無能為役而王氏
賢父子所以相予則多矣

送周文良醫從興王之國

輦下儒醫正數君城東為別思紛紛黃花香入離觴飲
白鴈聲隨客棹聞焚券有名看續傳曳裾無事好論文
萍蹤落落仍多病金匱餘方得見分

題山水障子

畫王摩詰雲裏帝城雙鳳闕
雨中春樹萬人家二句詩意

摩詰詩從畫中見觸處天機自流轉黃鸝白鷺輞川圖
入眼何須好束絹多君此圖誰筆之謂是當年春望詩
綠草烟橫萼萼苑紅蓮雨足昆明池金闕沈沈半空起
柳暗花明連數里不嫌車馬踏泥行城外風光似城裏
太平有象作者難品題不在丹青間悠悠致主澤民意
對景令人生汗顏隱几秋霖玉堂署渭水黃山渺何處
倦來無力展新圖時復高吟右丞句

壽林宜人七十

閩海風光說上元一時佳慶繞魚軒
瑤池屢喜青鸞至丹穴齊看彩鳳騫
壽羨幾人躋耄耄教行諸婦謹寒暄
晴霄萬里瞻雲意併逐春風入故園

聞績溪高尹被獎勞之典

樂奏新聲彩幣紅令君名滿練溪東
風行驛路除宵警雨足山鄉樂歲豐
考績政成花縣久旌勞人羨栢臺公
題詩欲附循良卷思繞叢山紫翠中

和答屠元勳都憲

元勳都憲以賓之院長感秋詩見示久未能和也
八月廿四日朝退坐翰林東署雨中有懷次韻一
首

忽忽滄洲子京華兩見秋望塵驚市陌聽雨憶江樓白
髮欺誰老黃花慰客留歸心輕過鴈君寵若為酬

甲寅歲八月廿七日過大監戴公城東清適園
亭漫成一律

雨後晴沙不作泥路迴深巷忽聞雞黃交穉菊裁初盛
綠上新蔬剪未齊塵外畫縑誰布景眼前詩案好分題
主人莫訝難相見繞屋灘聲似剡溪

與曹良金吉士

良金吉士能背誦洪範君奭終篇一字不遺喜而
有感因賦一律時弘治甲寅八月廿八日

永日吾伊不憚勞篇篇成誦愛吾曹九疇一序皇猷遠
二相同心聖見高孔壁有靈開治本考亭無數仰人豪

閒拋歲月成何事三嗅芸香感二毛

孤松挺秀圖為用禮題

天寒地坼萬木凋何許直榦凌丹霄凜然夜壑走風雨
老龍怒挾錢塘潮人言丁公得奇夢手撫蒼髯欲飛動
良工好取獻明堂莫向空山委梁棟

壽慶雲侯母夫人八十

南極流輝徹絳霄北堂稱慶擁金貂恩筵味足魚麟脯
壽曲聲清叶鳳簫生值太平期百歲教行長樂冠三朝



飲餘試閱瑤池景慈竹凌寒獨後凋

送俞凝之赴徽郡照磨

亡友侍郎
振恭之子

不見尊公喜見渠郡中蓮幕奉恩除一尊把菊難為別
兩世通家老愧予行李却隨征鴈後到官應及杪秋餘
因君定作鄉園夢先到南山水竹居

次陳白沙太史韻送廣東何貢士赴南京光祿

署正

何以孝行
被旌其門

世誦何蕃傳名題孝行門積誠孚草木貽訓及兒孫簪

紱新恩重詩書舊業存
貤封君素志綸綍待王言

題泰和吳尹必顯祈雨有感卷

杏園風日早蜚英
花縣功名合有成
一雨慰民非偶爾
寸心憂國是平生
帝聞美政酬褒典
人樂豐年起頌聲
此日恤荒頻下詔
為君題卷不勝情

九月八日閒步公署西園獨坐亭上有懷

公退聊乘半日閒
小園深徑雨苔斑
紅塵不到幽亭上
白鶴長鳴古樹邊
老學簿書空有感
才非供奉久無顏

明朝又及黃花候何處登高憶故山

題金太僕本清竹

往年曾識太瘦生風神如鶴詩有聲高情雅澹惟愛竹
揮染不讓東吳卿一竿兩竿已清灑鳳尾蕭蕭翠堪把
秋空弄影縱復橫宛坐山窓月明下眼中何得千琅玕
怪石齒齒揚飛瀾人間六月無寸暑細看令我霜毛寒
憶在江南白沙渚十畝新篁舞烟雨腰鎌斲筍薦松醪
不惜年年自賓主馬蹄再觸京華塵夢魂長繞蒼庭筠

偶窺墨本猶昨日滿耳清風懷故人謫仙之孫好圖史
風節稜稜重金紫公餘相對欲忘餐為說堅貞似君子
朔氣來時噓凍雲千花萬卉無餘芬憑誰可結歲寒友
雪後青青惟此君

太卿李君景和早與予同事嘉禾呂文懿公先生為
憲友三十餘年嘗以其所藏梅花圖索予賦矣今又
繼之以此墨君蓋思以歲寒之好相期也惜予詞翰
鄙僕不足以副公雅意姑題此以塞白云

輓劉屯田

都憲敷之姪
安尹麓之父

宰木蕭蕭掩墓場屯田人去幾星霜
早將禮樂魁南甸幾出忠言拒左牆
小阮立臺昭世訓髯劉為宰冠諸郎
名鐫翠碣青山下擬共禾川逝水長

壽錦衣魯宣百戶母八十兼受封

禁衛才名羨魯侯誥頒新軸錦盤虬
恩封不比尋常慶慈壽將臨八十秋
鶴醞屢嘗春拂面翟冠初上雪盈頭
顯揚有子身仍健海屋遙添第幾籌

送汪廷器艮觀

曾隨南鴈住雲中又出榆關到海東壯歲儘誇行樂好
太平誰致塞塵空輪蹄慣比孤舟速書畫收魚百貨豐
來往莫譏江上客王孫家世古元戎

吾鄉汪廷器嘗客大同又客遼左有題其行卷曰東
北觀者予疑其贅則笑語之曰東北者艮方宜易之
曰艮觀本出戲言廷器亟以為佳因更之且請一詩
廷器江南人也乃安遊東北極邊之地不以為苦而



以為勝何哉豈國家承平之久雖四裔皆為樂土而
估客遂眷眷于彼乎抑廷器本出越公之胄其風聲
氣習尚有所承而不泯焉者乎詩以諗之

篁墩文集卷九十

欽定四庫全書

篁墩文集卷九十一

明 程敏政 撰

詩

和荅屠朝宗都憲見贈之什

時予與賓之廉伯啟昭同陞

久幸斯文號一家
我慚學海望中賒
修鱗合附風雷起
朽木那堪雨露加
講幄寸衷看日稿
宦途多病數年華
緇衣可續知公意
不負崇班帝汝嘉

積書空似鄴侯家
白髮侵尋歲月賒
清世一官無寸補

湛恩三日愧重加

十四日徽幸進官
十七日承乏署印

思從尹謝研家學

敢共盧王鬪國華天語不忘供奉華

首意特書日
講官三字

消埃

何力稱褒嘉

詩筒來自大夫家路轉東城一逕賒珠玉在緘光照映
龍蛇隨筆影交加君才入眼真無敵我屋從今倍有華
擬發舊醅酬近約晚秋風日正清嘉

三鳳高翥附鸞可慚承惠佳篇同一褒與此過分之
愛也謹用來韻奉酬語不逮意遂至三疊其贅可知

惟大賜改教乃幸

沈啟南畫障為張通守題

啟南自題
楚詞一曲

石田老人非畫師
胷中丘壑天所私
揮毫便覺真趣發
意到豈借丹青施
通守張君畫成癖
半幅生綃比全璧
望中謂作雲門山
遊人擬辦登山屐
峯迴路轉溪流長
誰向石林開草堂
風簷舉手欲相問
扁舟載客來何方
老人畫出今人上
鄉評未數黃公望
一石俄成斧劈痕
不類羣羊更奇壯
石田隱處輕輞川
秀句却似王維傳

吳歌一日變楚語幽芳懶鬪春花妍我從胥門八回過
古寺長邀聽經坐老人不惜與畫山擊節詩成幾人和
尚方有詔徵遺才白髮蒼顏能一來還君此圖意無限
停雲正繞姑蘇臺

壽樊駙馬母夫人

壽筵風景似丹丘珠翟輝煌映白頭女士向來誇鄴郡
帝甥今日數樊侯庭暉影轉莫更朔宮露香分菊戀秋
却指南山問東海幾時清淺報添籌

賀屠朝宗進左都憲加太子少保

鳳勅輝煌聽曉頒，鴻恩汪濊屬丹山。
江南舊望傳三輔，嶺表新功震百蠻。
左轄位當烏府印，東朝官重紫宸班。
清時才傑如公少，看立勲名宇宙間。

題小景

黃葉風前守釣磯，石梁沙口負薪歸。
輪蹄只在青山外，想見紅塵撲面飛。

贈河間丁襄教諭

頻水芹香襲佩裾
臯比中坐八秋餘
令丞釋菜詢籩豆
子弟傳經候起居
春捷尚期廷試榜
年勞先入考功書
廣文異日推瀛海
只在丁寬衆不如

送戴廷珍侍郎持節冊封魯府

龍節親持下九重
亞卿風采羨儒宗
虞廷訓誥班新冊
魯地山川析舊封
還闕使輅期再月
出城吟橐記初冬
孔林咫尺歸途便
一叩宮牆禮聖容

送江文瀾侍讀持節冊封荆府兼有壽母之便

玉節煌煌下紫清冊封初命講臣行離筵把菊聽歌郢
次國承恩許紹荆人擁使輶觀盛典吏隨公牒報嚴程
歸途正及梅花候春向高堂百倍生

送戈良玉御史赴四川憲副崇夔保順兵備

栢臺高處歲頻更奉勅寧辭萬里程雲擁千旄歸節制
風行山岳聽威聲攜家遠過金牛嶺攬轡長臨白帝城
珍重盛時勲業在好將蘇息問蒼生

李侍御二畫

縞衣清露濕漙漙四顧松陰弄影寒老警自能知夜半
不緣明月下瑤壇

右鶴

又

啄宿相依葦岸潯幸離矰繳幾秋深可因戀稻頻來往
須識隨陽一片心

右雁

與莊定山司副潘時用待詔同至李賓之學士
先塋登古城

看山空負一秋強出郭來拋半日忙草沒斷堤牽步遠

柳拖斜日送陰長百年丘壠懷先輩幾處園林似故鄉
却盡壺觴臨澗水恨無漁笛和滄浪

古城高處立殘陽醉眼憑陵見八荒木落放教冬嶺瘦
鳥飛橫絕暮天長鐘聲遠認馭經寺幟影中開閱武場
勝覽未窮吾正健不愁荊棘冒衣裳

送表兄林文美上舍赴青州訓導

郡博承恩出上庠宦途仍喜近家鄉詩書俗厚稱齊下
兄弟情深憶渭陽寒月擁裘催去馬夕亭呼劍引離觴

官中舊識如星聚不日分光到講堂

表兄林上舍丈美少與予同受學于先少保尚書襄毅公屢困場屋今歲始以試授青州司訓觴別之際賦此為贈惟青州太守潘公有一日之雅同守李公推府徐公皆鄉故莫逆而憲使于公又丈美師也丈美固將有所遇而少免于獨冷之嘆哉

送吳汝德上舍赴澠池司訓

官舟南下逐寒潮離思難勝郭外橋仕版姓名初受祿

講堂朱墨細分條
嶠函境接山河勝
秦趙臺空草木彫
麟史一編君舊業
幾人延頸待甄陶

休寧吳君汝德以貢上京師得試授澠池訓導蓋天官卿知吾新安春秋士之可以與進來學也於其別也詩以送之

題四小景

日日棲空館
呼童掃徑苔
飄然騎鶴侶
時自海東來

右道院迎仙客

萬卷芸香裏蕭齋絕點塵須知調鼎客原是斷壑人

右書堂隱相儒

琅玕親手種早見拂雲梢要叶虞廷管殷勤待鳳巢

右庭栽樓鳳竹

小小儲金鯉池波一鏡平不須桃浪暖頭角亦崢嶸

右池養化龍魚

送滿城尹劉象謙

同年友
孔昭子

隴西家世偉丰儀京邸相逢恨見遲早探杏園馳蹀躞

整分花縣撫瘡痍同年有後能如子異選無多定屬誰
大器可常淹百里內臺徵節快相期

同庚會壽施院使欽

曾向西隣暫卜居美君供奉幾年餘嬰醫素出尋常表
朋壽今當五十初香愛菊花浮醖面秀看芝草茁庭除
海籌添屋從今始借取家傳肘後書

題罷獵圖

沙磧風高樹鳴葉馬放平原人罷獵解裝散出青草間

兩兩胡姬映桃頰
酪漿滿注金叵羅
侑飲似唱陰山歌
雪鷹離條犬噬肉
穹廬到處皆行窩
大旆揚揚出烟表
不覺殘陽過林杪
健兒自許力未疲
翻身欲射雲中鳥
打圍之樂樂未央
挽弓握矢心茫茫
嶺陰直接賀蘭道
馬上終老單于鄉
當今聖人制諸夏
八方無塵羽書寡
但願常常似畫中
莫近三邊古城下

題田家娶婦圖

逕草如烟柳如幕
日上茅簷鼓聲作
田翁遣女不出村

東舍西隣隔墟落新婦駕牛兒跨驢家人後擁翁前驅
兒家舉酒攔道勸舅甥幾世同桑榆耳邊阿婆私屬父
肩上嬌嬰肯離祖歡聲一路到柴關野伶山歌柘枝舞
兩門彷彿朱與陳鄉儀簡古民風淳華筵肆設競珠翠
想見紛紛京洛塵婦饁男耕罷征戍安得移家箇中住
長因擊節頌年豐不作催租打門句

壽歙義官王富祥

朱顏猶未點霜毛甲子初周第一遭丹白笑人分藥餌

綺筵隨意醉松醪承恩始覺衣冠勝閱世寧知歲月勞
喜到賢郎稱壽日梅花如雪照江臯

謝方伯輔夫婦輓詩

五子長絰國學正次紹知
府次綬工部侍郎次紳次

緝刑部

主事

薇垣人去幾春冬曾說賢勞動九重琬琰有文書大節
衣冠無計返生容家庭稿在青箱貯方岳功成紫誥封
餘慶百年流未已鳳毛誰及謝超宗

高堂偕老穴同藏閭職名隨澗水長家訓不驕親子女

恩封猶愛布衣裳塵埋婦苑庭萱殞却盡仙籌塚樹蒼
撫卷為君聲薤露五常真見白眉郎

題祝黃門金鯉引子朝天圖

滄溟白日吹腥風桃花浪感連春空一魚金甲忽騰起
頃刻變化雲雷中四魚雖小亦奇健鼓鬣偕升尾相貫
蹄涔回首顧凡鱗咫尺龍門隔霄漢劉郎寫魚如寫人
鵞溪大幅開天真臨池揮染不論月董羽楊暉爭幾塵
番水名流今大諫頭角崢嶸萬人羨丹青此意君得知

射策還徵過庭彥

題周駙馬所藏小景

一舟隨泛水雲中
醉愛高眠仰受風
驚起竹林雙白鶴
背人飛過大溪東

十二月七日監放官吏俸糧其冊云學士程某
等共支米二百石初蓋不知當此首選也戲
成一律奉寅長西涯先生同一捧腹云

三十年餘翰墨壇強顏來作計
籌官清朝制古班恩厚

冷局人多卒歲難吏事不堪詩興敗公庖無暇晚炊寒
偶披俸歷掀髯笑淺薄由來首素餐

題石菊

一峯筆立青琅玕介若端士何桓桓託根祇許霜下傑
凜然正色凌秋寒酡顏相倚為誰好仙人自喜朝霞餐
山川入眼盡搖落百卉豈敢誇鉛丹石稜蒼苔蔚萼萼
花頭灑露清漣漣醒時把菊醉憑石柴桑風致餘江干
好事何人得佳本嚴陵邑子今郎官郎官博雅近出色

鼻祖與我同新安奉圖見過索題品彈指一春經歲闌
哦詩却憐寫生手意匠不減揮毫難玉堂公退塵鞅絕
硯池火燒冰花殘臨風喚爾金石友為增騷譜盟雞壇
吾宗節之郎中以此圖請題踰年矣歲晏齋居愛是
佳菊竒石為賦長句且號曰金石圖而歸之蓋石以
本名菊以色顯也

甲寅除夕餞歲有作

時元會日曠子當奉
駕之役因書示之

朝元先自拭宮袍守歲仍呼煖濁醪三品職銜愁不稱

一年詩債幸粗逃東風暗轉窺蓬戶北雪公添入鬢毛
更屬小兒須早起扈行仙仗莫辭勞

弘治乙卯正月十一日郊祀分獻東海壇紀事
瀛東迂拙愧仙才分奠滄溟此一回金屋雪消風應律
紫壇塵淨月當臺享神樂備鈞天奏扈蹕人從複道來
願積海籌添聖算常占雲氣望蓬萊

送工部傅曰會員外荊州抽分

侍郎曰川之弟
公事畢有過家

之便

南望荆門郢樹深
水曹分部稱華簪
一舟破凍催行李
萬木浮江待主臨
吟草便煩京國夢
掃松兼遂故園心
羨餘有獻非君事
江漢清風喜自今

題墨梅寄陝西巡撫王都憲表倫年兄

暗香飛沁墨池深
幾日春回萬玉林
喜報隴頭消息好

一枝先寄歲寒心

時乙卯正月四日也

題志遠兩浙巡宣卷

江東才彥夙超羣
浙上巡宣更數君
諫院幾陳匡國疏

分司常揭劬農文名高古亦來深忌盜息誰堪策茂勲
却幸邦人詩史在一篇留與四方聞

予讀志遠此卷大理夏公之作所謂據非所據侈以
肆蔑視典章張氣勢豕心溪壑屬無厭人於何誅天
必棄連數十言凜凜若秋霜不少恕其意殆有所指
也慨然有感往事而賦一詩用申其說云

送庶吉士汪抑之養疾南歸

幾日東風來河水已全解之子將告歸離情渺江海念

子極英妙一舉魁南宮射策動天子籍許金閨通選試
白玉堂青萍益增價倚馬萬言成觸目五行下攻文不
自己稍稍疾見侵經年別桑梓歸夢西江潯承恩出都
門戒道以南往喜有水部兄圖書接官舫憶捧育材詔
我愧章句師羣英數請益空空竟何施與子今暫違完
養無自爍能識舞雩心行矣當勿藥子本越公胄近出
丈公鄉至言久相領敢謂一日長遄歸定何時及此答
隆遇病起罷春醪悠然賦長句頗聞二千石視膳亦有

期予言倘印可一笑誇儒醫

昔我明道先生謂自古未有因學而致疾者今抑之
頗以學致疾豈所謂疾者非以學之故耶抑所謂學
者探索過於涵泳而與古人異也蒙恩暫歸義弗忍
別因賦此為贈或疑其意繁語贅非善鳴者然予方
有進于抑之而抑之亦將有味于予言豈以是為祖
道之飾而較工拙哉

題楊克仁鴻臚公車奏牘卷

口傳奇略自先侯身退常懷致主憂擊節幾人歌出塞
誦君三策氣橫秋太平制敵寧忘戰老將成功半伐謀
分取劒囊收疏草他年西繫月支頭

予觀楊君此卷因感其父鎮撫公成化初陳言荆襄
事適相類然當時猶有臺官愬其功于朝而獲以功
名自見也公論久益不可揜楊君何患焉鎮撫公事
予嘗序之今三十年矣

題戎王出獵圖

黑山之北青海頭草木搖落風颼颼平原一望渺無際
獵騎四踏黃雲秋戎王小年面如玉彷彿當時李存勗
錦袍白馬彎琯弧一箭真應倒蒼鹿蒼鹿却走青羊奔
沙磧霜中餘血痕相隨兩兩奉驅策羶裘辮髮皆羌渾
一犬騰身逐驚兔後騎韝鷹笑相顧大家賈勇各忘疲
倒載爭多不知暮健兒獨往先着鞭自期百發無虛弦
何物霜蹄忽星迸脫手落地仍欣然幾輶轡車駐山口
應待歸來勸胡酒共燭熊掌炙駝峰敕勒歌長出林藪

歌長晝短樂未央
皂旗閃爍天蒼涼
明朝移帳定何所
擇地還開新獵場
方今聖人居大寶
烽燧無烟罷天討
弓兵長作畫中看
莫近飛狐塞垣道

送魏黃門秉德延綏盤糧有燎黃之便

聖主憂勤念足兵
近臣特奉璽書行
離筵暫爾停車騎
外間遙應識姓名
賈誼心勞陳政疏
韓公力築受降城
傳家貞觀遺忠在
幾日封章達帝京

馬首春風潞水村
掃松先喜到塋園
新開翠碣書慈行

久錫鸞封荷主恩玉節擁塵驚巷陌錦衣流彩動川原
此行孝與忠兼得為拂谿藤寫贈言

送張黃門經兩廣盤糧

手持黃紙下紅雲祖席東風酒半醺總道使華當盛選
誰將邊粟付虛文行程烟火蠻中市候館旌旗嶺外軍
青瑣再登知隔歲皂囊頻達九重聞

請楊貯春太醫為栽盆蓮

老手栽蓮不衆同繞開栽藥未論功憑君為致西湖種

添我山棚十丈紅

胡氏二親南山遙祝卷

子節鄉進士
開塾士欽家

遙祝南山啟壽徵木公金母慶相仍
酡顏拍拍春同上
短髮蕭蕭雪半增
漢歷一周開鶴算
禹門三級待蛟騰
舊家歡動零陵郭
綺席松醪盡幾升

送馬少卿宗勉謁告歸常熟

東風吹柳拂征車
感激恩生謁告餘
幾日從班虛禁苑
一宵歸夢繞丘廬
碑當有道銘誰撰
詔出顏公手自書

暫去即來天子詔不勞相念託雙魚

樗老行

老人有家住吳中白髮被領雙顴紅南華一卷常在手
富貴過眼驚塵空古樗繞舍青童童婆娑盡日心神融
大株擁腫小拳曲斧斤自慶逃輪工爨焦久惜吳山桐
霜落亦任吳江楓老人與樗兩相契全身綽有莊周風
兒郎秀出芳桂叢肯構獨建詩書功棟梁之需固在此
致身已到明光宮老人跡比樹屋傭老人壽似桃源翁

我愚安得往分席冥冥羨彼雲間鴻

楊君仲實吳下之耆而賢者以樗老自名蓋有取于
蒙叟全身遠害之義也君有子昇舉進士入翰林為
庶吉士從予遊間道其事予嘉其為人為賦此篇

壽李侍御思承母

思承出按江南列郡
得使道歸省均州

寶婺流輝啟壽符名郎承詔向三吳萱花堂背春占鵲
栢樹臺端曉集烏雲繞舊家隣太岳酒成新味似蓬壺
酖顏百歲知無恙看取鸞封出帝都

首夏齋享宿翰林東署作

玉漏沉沉夜下遲
絳河星影動罽毼忽從枕上聞啼鳥
却似南山獨卧時

送傅佐還南京

花邊江到石城村
鳥外山圍白下門
川陸自今勞奏事
衣冠他日待承恩
閒居字學黃庭在
幕府家傳露布存
年少壯遊渾得意
不須攀柳薦離尊

傅佐秉忠嶺表之彥
予舊識之於閣老瓊山先生丘

文莊公家其為人好學善書今被命在南京守備幕府有進補之階矣

玩芳亭為段太監次西涯韻

沿逕入芳園蕭然覺塵迴起登罨畫亭四望如野景平生漢陰志俛仰慚掣綆牆竹來清風水花破幽洞主人性愛客時遣送佳茗摩挲靈壁峰孰是仇池境妙哉泉石趣最爾車徒騁草色侵簾幃芸香襲衣領為和郢中篇煩心坐來省

僕所懸學士牙牌乃文懿公舊物今僕已獲新
製者敢用歸之維立寅長侑以一詩用備詞
林故事且以著楊氏之盛云

此牌休道閱人多兄弟懸來得幾何競爽衣冠誇淞水
承恩先後上鸞坡我慚白雪歌難續君愛青氍手重摩
他日階庭看轉付森森蘭玉待高科

五月八日翰林前堂坐書所見

公署忙閒不自由眼中詩料忽相投草分暗茁攻磚罅

金匱要略卷之二十一
槐出橫枝蔭瓦溝

卷九十一

送楊志仁憲副謫長沙通判

文懿家聲却有光
喜從郊野見孤凰
許身價抵千金重
愛國心隨萬里長
九辯賦存堪侑席
貳車官好勝監倉
當今聖主恩如海
刻日鳴珂入建章

予荷恩昭雪入朝
志仁憲副有詩寄慰
久未能和也
今志仁有長沙之行
矣情可已乎握手之餘
得此為別

送尹同道還歷城

太宰之弟也太宰孫女出嫁英國公子同道實主其事

情切鵲原衆不如往來無惜走征車
百年子女成姻後幾日鄉關入望餘
白社已開嘉慶宴紅鸞遙報上公書
先朝太宰今無恙為託殷勤問起居

蓮沚為山東周仲瞻叅議賦

夜來一沚雨濯濯明新妝朝來一沚風
萋萋聞清香主人霄漢士系出汝南房
言愛君子花卓彼草木場搖搖青玉佩
文采丹霞裳淨植無纖塵摩挲共滄浪
豈無若

耶舟過眼矜年芳亦有泰華井吐詞落荒唐君家無極
翁故宅遥相望敬讀愛蓮丈手澤疑未亡溪堂白日遠
庭草春風長倚歌賦蓮汴却愧通家郎

內閣賞芍藥次少傅徐先生韻四首

玉堂佳地苑牆陰紅藥根蟠歲律深題品正宜宗匠手
栽培那識化工心香浮御坐堪誰比價重名園不易尋
前輩賞緣今更續一編留得鳳池吟

花神如在鏡中歸七寶妝成入眼稀人立嘉名稱近侍

天留奇品殿芳菲
藥籠重此長醫國
詩陣憑誰一解圍
坐對薰風看未足
半簾斜日下龍扉

宮樹花飛盡綠陰
陸離紅映掖垣深
仙妝露洗羞塗額
國色天成笑捧心
池上紫薇元並植
風前黃蝶敢相尋
錦亭爛熳金尊賞
消得玄暉一句吟

蕊宮仙子步虛歸
困倚南風午夢稀
寶鼎半薰香冉冉
錦袍穠襯綠菲菲
題慚郢曲歌千數
賞愛胡牀列四圍
莫問揚州三十種
幾多拋擲傍巖扉

五月十二日公署後園偶步

堂西亭子大於瓢一雨才晴暑半消
幾日不來亭上坐
擁階蒿梗綠齊腰

便面題寄秦恭叅將

却敵能分北顧憂
齊紈何似掌中籌
一揮聽取清風起
散作邊城六月秋

送進士李應靈赴宣城知縣

應靈亡友戶部
郎中炯然之子

柳絲低蘸水云云
百里恩除喜送君
登第向來傳警策

勸農他日看新文政成擬賦江南樂才美終空冀北羣
忽念李邕今不見舊遊踪跡負停雲

題洪克正行樂圖

峽口青松結成屋雲表蒼崖掛飛瀑一觀已具四時花
何代雪樵今更續烏帽朱衣林下行琴書獨樂輕浮名
須知郡伯有是子不道侍御難為兄竹底奔淙如劍截
此外黃塵任飛滅礫砢千羣翠欲流離披萬樹紅堪折
石棧丹梯不可攀望中却似天台山願君壽比洪厓老

他日相期問九還

右歛洪君克正故太守有約之子今舅史克毅之兄
於予有鄉戚之雅間出陶成此圖請予一言予觀成
畫最不易致而克正得之工且亟如此豈其仁賢足
以服其心馴其俠而有是哉克正雖客遊心恒靜逸
喜自養類有道者故詩及之因以諭之

湖廣巡撫韓貫道都憲年兄移治河南有詩見

寄次韻奉酬

一緘細讀晚風前秀句分明壓惠連別計數年書札少
喜占今夜燭花偏尋行我負經帷久換節君承御墨鮮
玉署有懷清不寐可人明月共逢天

樸菴先生何公哀輓八章

都憲鑑之父

行比先民老更成恥隨流俗競浮榮家山日暮愁雲起
留得菴居樸字名

曾從江上拾遺金瓦礫相輕見道深野史有人應作傳
世人誰是古人心

饑氓不道食無糧貧女還應嫁有裝遙想輜車臨葬日
幾人遮道淚浪浪

孔墻東畔起高樓望見宮前泮水流家訓有勞人共指
都臺聲價重宸旒

窓下俄生並蒂瓜可須紅紫鬪繁華高人已作全歸士
和氣猶傳積善家

山中避暑睡方甜門外於菟識孝廉壽到古稀仍過七
老天明示吉人占

曾受清朝御史封華顛烏帽見真容墳前更豎蒼崖石
待取鸞書下九重

勅葬恩深動一時松楸長繫百年思几筵況有奎文在
不用人歌薤露詩

送莊孔暘年兄赴南京吏部郎中

北來南去太匆匆出處關時道未窮林下有詩長教我
朝行無力為留公韋齋吏署遙相踵茂叔郎銜亦偶同
一雨洗塵青更好定山才隔大江東

桐隱為龔鳳賦

曾向吳門識大龔喜君繼隱託孤桐薦書那復干知己
篆刻爭誇似乃翁竹院隔隣秋興足葑溪當逕午塵空
君王舊有招賢操正在南薰幾曲中

吳龔廷臣博雅能詩尤精于圖印予舊識之且嘗訪
之見其堂扁曰有竹人家今十二年矣獲見其子鳳
于京師其于圖印亦工又緣其名字之義自號桐隱
求予詩輒賦此以九成之材藝當壯歲終隱而無所

遇于異日乎

故禮部侍郎東嘉章公哀輓

公諱綸贈尚書諡恭毅

早叅儀部識人龍
長荷先生降禮容
林下黃花方采采
墓前芳草忽茸茸
生榮有客同三省
死諫何人犯九重
千載懷賢憂國意
臨風誰說涕無從

喬烈婦

故侍郎喬公歿之妾殉死旌表有司為之立廟

侍郎家範肅於霜
義動幽閨恥未亡
身絕素幃風黯慘
魂隨丹旆日蒼涼
祠前歲晚松逾勁
隴上春來草亦香

太史為書佳傳在千年留激懦夫腸

許由棄瓢圖為廷殷姪題

心寂何妨響萬瓢棄心生處勝狂濤耳塵暫滅心塵起
却恐先生見未高

遊錦衣章千戶彥廣園亭

雨後園亭秀逼人偶來忘却宦遊身竹林氣爽寧知暑
槐幄陰濃不受塵酒發舊醅春灩灩果嘗新摘露津津
晚涼無限濠梁興獨瞰芳塘數巨鱗

抗塵松栢翠為亭夾路薔薇錦作屏盤谷人家兼紱冕
輞川風物中丹青詩囊瀉處真誰壯屐齒歸時亦自馨
地主分花頻訂約儘開荒圃候園丁

彥廣錦衣西園最勝惜無題品者予偶過之為賦二
律寫置壁間繼此客當必有倚歌之調則異時有聞
于後者或自予始

題大理王卿墨竹

斷縑一幅瀟湘秋筆趣彷彿文湖州坐覺清風滿人耳



洒然六月登江樓主人重是王子猷琅玕直節非時流
歲寒長共此君約紅紫紛紛何所求

送李宗仁太守赴延安

麟符分部歲華多漢吏誰優政事科直北朝廷瞻紫極
迤西封域近黃河憂民屢聽芝泥詔樂土終傳麥秀歌
珍重范韓勲業地舊題崖石待重磨

送盧文淵進士赴兗州推官

黃甲才人領郡刑由來欽恤重虞廷薰風拂棹催登路

甘雨隨車待過廳萬卷讀來需法令一方行日按圖經
他時不負功名地咫尺尼山入望青

次韻題竹鶴老人畫

林間二客妙無語溪上一航隨所之江山偶爾興不淺
誰說丹青老未奇

行臺春意

巡撫畿北張都憲天瑞寫竹寄巡撫南畿侶都憲
大器題曰行臺春意大器求予詩

年年新竹破蒼苔
清拂江南舊栢臺
不道停雲高興發
却從江北寄春來

紛紛紅綠委黃塵
入眼琅玕秀逼人
勁操不隨霜雪改
行臺長占四時春

風前無數翠鸞翔
粉箨初翻細細香
公暇留題詩滿幅
後人應比召公棠

春雷殷殷動江村
頭角崢嶸徧石根
回首一灣溪上路
為君歸思繞篁墩

贈工部祝惟貞員外三吳治水還朝

幾年人議白茅塘此日功歸粉署郎
來往共誇新水利疏通誰識舊河防
舜廷取次看行賞吳地從今不奏荒
底用勒銘江畔石東南遺老頌聲長

西園作假山成約諸僚友小酌

三年不見青山面百計荒園小作山
新竹亂栽渾岷奕秀峯高塚亦孱顏
誰家景出丹青上終日身當紫翠間
等是太平樗散吏一尊相約共娛閒

慕萱

休寧孫君廷秀少而失恃以慕萱自名石田老人
為作慕萱圖聞而詠之者甚衆予與君同邑人且
重其孝思也為賦此篇

階前五月萱花吐日日見花如見母對花不覺雙淚垂
安得花前彩衣舞人言種花憂可忘孝子之憂江水長
花殘却有再開日暮雨蕭蕭空北堂

雙鶴圖為汪東曙題

長風劃然起林末遠近嵐光翠如潑虬髯倒捲怒濤翻
谷應川鳴海天濶雙雙忽見青田君振翮一聲高徹雲
遡風擬先鴻鵠舉爭食寧甘鷄鶩羣手撫玄裳莫飛去
入眼分明有奇趣丹青定自薛公傳題品慚非少陵句



箕墩文集卷九十一

欽定四庫全書

集部

篁墩文集

卷九十二
拾遺

詳校官編修臣李堯棟

中書臣劉源溥覆勘

總校官進士臣朱鈐

校對官監丞臣張魯炳

謄錄監生臣錢雋選

欽定四庫全書

篁墩文集卷九十二

明程敏政撰

詩

終慕

邢志尹揮使有終慕卷張靖之郡伯序之詳矣間
日便風以書求益念亡友之不作嘉嗣世之有人
俯仰慨然為賦長句

邢侯昔總海上軍將星一夕沉秋雲名郎克肖武且文

陟岵之念忘朝曛幕府新開向西浙喜乘樓船舊旌節
舉目愁登閱武堂寄治僧房寸心結海波東逝無回川
嗣侯之孝人爭憐移却忠勲報明主聽取人歌終慕篇

維則軒

汧川汪君思仁之居親喪也廬墓三載既歸而題
其軒曰維則蓋不敢取足于是而又以望其後之
人于無窮也其子尚文求予詩予方在哀疚中一
切文事皆已謝絕而重思仁之孝為不可及勉賦

此篇

寒日下喬木回風動前軒憶當親在時於茲奉寒暄一朝事變作白玉埋荒園墓廬忍棲息三回見正元
灤灤春露寒凜凜秋霜繁傷哉罔極恩恨不同九原歸來過庭處階草青更蕃載誦下武篇感激思聖言高楣揭華榜求仁示南轅勗爾子若孫永矢當勿諼雲山高岸隄磧水鳴潺湲相望不可即淚下空瀾翻

輓王端之

子茂材為儒學生

君來古歎曾過我寒日松梅話小軒我到錢塘還訪子
暖風花竹讌名園笑談追想如三宿魂夢那知隔九原
哀些慰君君莫恨紫霄雛鳳待高騫

清明拜掃遠祖兵馬府君墓

府君都使灃公之子唐季以一軍鎮休寧遂居邑
陪郭官至歙州兵馬先鋒銀青光祿大夫左領軍
大將軍負外置同正負兼知休寧縣事卒塋邑東
阜土名知縣突嘗一見侵于異姓敏政率族人復

之正其兆域

亭臯東半匝松杉百世英靈此秘緘古蹟未亡知縣突
堅珉猶刻領軍銜司尊瀉露澆墳土殉劍飛虹貫石巖
支下聞孫今白首亢宗無力愧朝衫

永思為夏璋賦

親恩誠罔極子孝在終慕乾乾奉豆登戚戚感霜露烟
然一寸心萬古如旦暮悖德者誰子上帝均所賦多君
揭華扁常目若大寤田渚督耕漁川陸市泉布時時見

請益往往行却顧此心亦何心寧以勢迫故卓哉紫陽
翁美此歙州路民生多秀良子得固有素敬身則天民
保族謹王度庶馬副所思芳聲踵前步

文燦憲長親家將赴任廣東病中無由往拜書
此奉別

碧山紅葉路參差憲節行當九月時五嶺使軺縈宦轍
一方民瘼重監司官清豈解持端硯主聖無煩貢荔枝
多病不堪臨遠別浮雲空繫故人思

汪敦善以詹簿弟春草圖索詩強賦一絕不忍
復觀也

滿地菲菲綠漲春多情長踐落花茵謝家風物依然在
不見臨池染翰人

望雲思親圖

婺源葉世榮居休寧有年矣嘗作望雲思親圖縣
儒胡靜夫記之而因予所善句一言其懇請之篤
甚于市夫之逐利士人之求官予憐其志因為賦

此

朝看雲出壑暮見雲歸山庭闈悵何許人子傷朱顏當
年遶親舍千里念行役今茲遶親塋三時淚霑臆里儒
為作記良工繪新圖雖知一念性十室慙非夫夷之亦
何人亞聖特相勉老我寧失言珍重望雲扁

丈夫還發源

丈夫成化中佐予編刻程氏統宗譜二十卷貽範
集三十卷凡七百餘板今復佐予編刻新安文獻

志一百卷凡千餘板志健力勤殆吾宗所僅有也
春盡夏初覓還其里因賦此相贈且遙其再至云

爾

多病劬書感二毛喜渠同志為書勞聊將簡冊酌斯世
一任高賢笑我曹譜協歐蘇先繡梓文徵殷夏幾揮毫
山堂與訂重來約莫待西風入緼袍

積慶堂

富溪宗彥道升里之善人也年逾七十有子有孫

里人為顏其堂曰積慶論者以其名太腐難於賦
咏予以為不然厭常喜新士之患也為作一律以
解嘲不識觀者以為何如

總說堂名太腐生幾家不愧此堂名心田墾熟收三倍
義壘功深築九成揭日片言垂訓足履霜千古戒人明
吟場莫恨慳詩料滿耳鄉評即頌聲

雪林為巖鎮汪道隆賦

夜下三尺雪曉起驚塵空萬木森玉立平原失西東有

客來騁望如在瓊田中名園渺何許飄蕭競春紅感之
思欲飛浩浩凌天風何當拾瑤草挈我蒼髯翁

約黃司訓汝彛

和韻小詩送去訂十八日之約亮愛我之深明日
早一至同備山裝也

數莖白髮感流年三秀靈芝在目前何地與君堪一語
雲巖高處絕塵緣

畫菖蒲為汪進士乃尊賦

峯峰秀岷岷清池下泠泠上有萑歌苗瘦奪莓苔青人
言九節根食之制頽齡云誰染毫素一登君子庭琴書
浥清氣几席來餘馨重此百陰韭更數千莢莫願致安
期生相隨住巖局

山臞

宦途長憶舊山薇名跡無勞問是非稽古例應吾輩瘠
匡時天遣福人肥手栽紫朮堪供酒體稱青荷欲製衣
循吏囑君三十載却從遺老試松圍

每於山澤愛儒仙貌瘦心腴事果然露飽枯腸塵外客
雪清吟骨匣中賢義經筆錄三分注膳譜囊封十字纏
他日浮丘堪問道一簞容與鶴分田

饒倅張君自號山臞名公珠玉之為卷者三矣君猶
以不得鄙作為歉豈高堂華燕水陸具陳而水菹野
品亦不可少姑以備禮而止邪

寄贈嘉興丞

績溪黃舜政予族道軒翁之壻也太學生授湖

州武康丞專督水利邇者改任嘉興苧縣事因書
此贈之

苔雪頻年水利多移官新寵向嘉禾庭當雪後雙松在
路及春前一棹過久說老成堪佐令早祈豐稔罷催科
館甥無限馳情處贈別言姜奈老何

月桂圖

天風肅庭宇玉鑑懸清秋霏霏金粟香湛湛金波流
林亦何常志士方黑頭須知漢庭對卓彼蟾宮遊

却說對策時號桂林一枝後人美登第者必援以為
比或者以月中有桂又號攀蟾步月置桂不言其展
轉之失非一日也門生彥夫師魯各以圖索題因出
此見併致期望之意云

方侍御到京後寄題梅一絕併咏憲臺梅三律
勉和二篇

瘦骨冰容不耐寒春花開落任悲歡天留一樹清溪上
正為山人喜靜觀

勝地清空絕四隣東皇先報一枝春
愔愔香氣侵衣冷的的鉛華入鏡
勻誰道廣平非賦手直應和靖是
花神山園亦有孤芳詠恰借君為
壓卷人

壽汧川宗人隆八十

古顏真似澗松蒼玉立還同野鶴
長當代仲車從耳聵有時弘景亦
瞳方小宗不愧端明譜晚境仍題
慎德堂指日詔書優大老為君先
致九霞觴

送王濟秀才還建德祖居祁門

草堂初識面文采重王郎新稻香炊白疎桐葉墜黃家
聲出江左歸夢遶池陽莫起并州嘆祁山是故鄉

送武康郭令

番禺郭君自德興移令武康考績上京師予族人
文邦客其邑以嘗受其惠句一言為贈且予素聞
郭君之賢而不及識也輒為賦此情見乎辭

武康賢令數時髦坐理朱絃不種桃六事屢當旌異選
三年何止簿書勞縉紳有待推華轂父老無煩擁畫橈

竹馬況聞先業在看君名蹟重銓曹

壽葉時顯

葉君時顯隱居歛岑山之麓年七十矣歲十二月
廿九日其誕辰也精力康強眉壽伊始因賦此寄
贈葉氏相傳為唐越國公法善之後因詩及之

佳辰開宴水雲居白髮朱顏七十初太華峯頭仙致藕
小焦山下客停車梅花破玉輸春早莫英留青報歲除
延壽想君家法在不勞重檢衛生書

贈陸彥功醫士

親家汪君克成嘗有疾承陸君彥功藥之而愈克
成深德之請予一言為謝予素多病其所以德彥
功者蓋有甚于克成也因賦此律附見鄙意

林杏飛香擁一廛往來多羨好心田譜分歛邑留先業
方自忠州得世傳醫國有名曾赴召活人無算不論錢
蹇予多病勞君久為客題詩感昔年

慎德堂

邑雷溪孫君仁賓早失所怙以慎德名堂思致其
孝也間持卷索予詩予以旅獒慎德語繹之正可
為君之字不獨可以名堂也因賦此貽之然予素
不善韻語隨筆所成頗與平仄互入雙聲疊韻之
體相類蓋其措辭乖刺不自知其至此也

孫君仁賓名一室揭慎德高堂傷淪亡恨莫報罔極時
時瞻雲思往往泣對客茲焉趨吾廬啟卷冀教墨吾觀
咸賓言子字適可摘名居兼名身外內兩竭力中心期

無慙百作詎有忒爰同書諸紳庶足示考則

寄贈江西段大參同年

皂蓋風行絕點埃湛恩近自日邊來除書驛報新薇省
夾路人迎舊栢臺南郡去思隨處見西山晴色望中開
九重側席夔龍選他日還應簡異才

年兄段公以忠前在荊州索鄙句病況交集久莫能
應也今茲大叅江右顯擢伊始輒賦一律寄贈致期
勉之私匪獨以酬吟債而已

秋林書屋為汪尚文賦

四時佳致擁山房却到西風趣更長日謝故人來舊雨
夜便燈火入新涼丹楓炫彩搖書几金桂飄香點筆牀
有待石林霜氣肅聽君瑤瑟鼓清商

族人抑昏更名詩

富溪族人有名昏字希遠者恒私語予曰名以制
義義以成禮古訓也昏豈可以自署哉請君更之
予諾焉既而思之君老成人人之習稱也久矣不

可以中改宜用徐無黨陳去非之例增其名曰抑
昏仍字希遠遠者明之至也謂當抑其昏而希夫
明之遠者庶於古訓弗舛也君謝曰善且請為詩
以告夫宗族友朋之未知者

昏昏勇當抑明明力當希顧名一自勗往哲思同歸逸
士號無黨賢人稱去非相望富溪月旅夕揚清輝

壽祁門宗彥用仁七十

用仁於所居本善一作善和門有五峯號竇峰五

桂用仁三子曰吉治家務曰啟儒學生曰攷治舉業故詳及之兼致勉望之意云

七十年華髮未皤壽觴行處客來多五峰挺秀鍾仙桂
一里常豐數善禾世德正分忠壯譜賢名宜入孝廉科
薰風為致長生曲古調深慙擊壤歌

十月廿六日病以酒下木香散立愈

何處堪尋却老方等閒只有太和湯調中即是仙丹母
行血真為聖藥王八節寒溫都可禦一時憂喜便相忘

莫將安樂窩中老錯比南朝達士狂

守約

西門汪慎氏以守約自名間攜此冊來請一言居
闕闕而有志于進修士之難也豈直求美于觀聽
而已

守書作書蟬守金亦金虜中有守約人居然邁凡伍三
省孰知要一儉更師古華扁揭軒齋箴規仰鄒魯

方侍御受勅有詩見寄奉酬

金臺方君士華以鄉魁擢上第召自畿縣受監察御史蒞職公清負器遠大真一時妙選也三載考績將有受勅之榮輒賦近體一律為行贈君故志雲先生元服之從子先生以詩鳴世而君實嗣其傳不獨舉業吏事過人而已詠嘆不足申以一詩併致意焉

早年文價重燕山桓鮑心期伯仲間出按遠提烏府印侍朝常肅紫宸班龍墀奏績衣冠擁鳳勅推封雨露頒

天子聖明先納諫濟時勲業起朱顏

玄英詩骨老雲巖衣鉢分明付阿咸
寫景尚隨蓮社約觀風何愧栢臺銜
珠流丙夜光難定鶴唳清秋韻不凡
健草如能慰衰朽新篇無惜惠泥緘

友竹軒

婺源族孫質字文夫一名彬隆嘗從予編校于南山竹院告曰近為一室以事藏修未有號也敢以為請予為號之曰友竹軒古人以君子比竹而加

之友者期其比德以自輔也語曰文質彬彬然後君子子之名字與號實兼之矣且為賦一詩發其意觀者尚無以予為善謔哉

勁質亭亭迴不羣雨斑晴綠更多丈平生獨立誰知己
一日相期得此君盟好自甘同晚節世情從薄似秋雲
南山却望高沙路已覺清風兩地分

棣萼聯輝樓

成化壬寅歲予會諸程作統宗譜婺源城東程氏

與焉城東之彥曰士奇為邑庠生為予言其父處士孟通與其仲孟達季孟遠極友愛構樓以居鄉達故翰林檢討陳克永先生為題其楣曰棣萼聯輝未有記因請于予予諾之未有以復也久之士奇不幸物故事遂中已然恒往來于心不能忘今茲南還始知孟通之孫檢孟達之孫栢孟達之曾孫耀暨檢之從子鰲並為郡邑儒學生益相友愛有先世之風而檢數來申其請顧予憂病之餘不

能執筆為記時賦詩三十二句貽之且以慰士奇
于地下云

東閣有高樓為問誰所營人言蜃湖裔家聲重岬城環
居數百指中有三弟兄相將若鼎峙敦此手足情朝讀
樓上書墳篋日和鳴夜宿樓下牀共被如姜生坐令閱
牆者望望慙分荆賢哉太史氏華袞揭新名斯人去已
遠友義垂休貞子孫襲遺矩學祖龍門程感彼棠棣花
春風益敷榮我昔會宗譜君家實同盟在苒十六年老

大嗟塵纓蓉峯翠如染星水涵空明何時一登眺攬衣
坐前楹對花說往事載賦鵠原行

遠上寒山詩意圖為汪鎰題

偶爾拈來語更工景隨天出愛唐風白雲紅葉寒山句
早被人傳入畫中

題自寫墨梅

敏亨弟以墨梅相視乃予八九歲時所作也悵然
賦此

墨本流傳四十秋不堪重省少年遊山堂雪後摩挲處
贏得寒花照白頭

姪塏本一名字詩

先尚書襄毅公嘗手擬諸孫名字以十數磨簿弟
之子曰塏本一或疑其義有不相蒙者塏既冠以書
來京師請其說予繹而得之以告曰塏燥土也夫
燥為義為剛於性為陽在人則幾于所謂秋陽以
暴之者矣然則土必陽剛也斯可建平一之基人

必陽剛也斯可成克一之德謂塏與本一之義不相蒙者弗思也柔者剛之反陰者陽之盪也以沮洳之土而望平一之基必傾以渙忍之人而求克一之德必斃一則純二三則雜一則吉二三則凶理也塏尚勉于陽剛而陰柔是戒使其德之日進于純且吉焉不已庶幾無負名字之義而煥然有光于吾弟之後哉

小阮書來求字說篁翁屬汝在躬行雜然為學聖所戒

卷九十二
洿處作基那得成立志要同莘上尹遺書休負洛中程
一緘不盡千里意珍重先公手命名

遊黃山約二三知舊

三十六峯天下奇廿年空爾卜遊期丹梯欲上捫參處
石罅還尋煉藥池詩刻定應誰賦好山靈莫笑我來遲
一尊約與君同去正值天空木落時

將發值雨東同遊者

戒嚴同作看山行寒雨蕭蕭欲敗盟肯為移文回俗駕

直須鐘鼓報新晴
千峯盡洗供開畫
百澗爭流待濯纓
奇興不憂霜逕險
促裝先賦一詩成

予與文遠為黃山之遊
太守王公至古城相餞
俾歌工二人侍行衛使
又送鼓吹四人蓋恐入
山荒寒藉此以破幽寂
也道中賦詩用備解嘲
州將來從細柳屯
郡侯同餞古城村
鼓笳直遣充前導
絲竹分隨有賞尊
勾曲勝遊寧此過
軒轅遺跡到今存
半生少慰煙霞癖
王謝風流敢並論

潭渡過黃孝子家

路當溪口淨無沙正及前朝孝子家
石表舊阡存劫火樹圍新廟鎖煙霞
遺芳焯焯青編在世事悠悠白日斜
來往客途驚歲晚臨風無計薦香茶

沙溪有懷承之亡友

里巷重來似隔春斯文情重欲霑巾
空階落葉經殘雨舊壁題名掃暗塵
子弟尚傳三禮學功名甘負百年身
淒涼最是沙溪水嗚咽滔滔送人

題延齡橋

水上新橋卧兩虹
延齡題字刻西東
自慚不是題橋手
都入行人指笑中

王推府許同遊黃山忽至潛口告別

公暇來乘半日閒
却將遊券負青山
剡溪自熟君家例
莫怪中途冒雨還

陰晴謠

一路肩輿走沙逕
一日陰晴苦難定
等閒一陰復一晴

天公向客非無情陰催吾詩晴縱目情景相爭兩俱足
天上陰晴那可常人世匆匆間亦忙天晴我忙竟何有
不如隨樂傾卮酒

宿楊干寺有先公題詩刻

先公曾此駐安車屈指年光二十餘老衲屢更新寺主
閒雲長鎖舊巖居尋緣邂逅山中客感昔摩挲石上書
寒雨畫廊凝立久不禁清淚濕衣裾

聯鑣來過遠公房一上高樓百慮忘坐近虛簷同聽雨

七翻宿火自添香上人作供時兼酒學士談禪欲借牀
為報登臨須早發呼童乘夜理山裝

將入黃山冒雨至楊干寺獲覩先襄毅公舊遊詩刻
感愴久之住持丈賢呈祥請飯新樓遂與二三親舊
同宿得律詩二章留寘壁間用備山中故事時弘治
丁巳十一月七日也

石壁嶺有感王推府之去

石梯危磴遶羊腸千仞峯頭一線長自遣吟身來試險

回車先見數王陽

聞彥夫言有作

擬出黃山路遠圖湘嶺遊客言何如清風景絕相侔怪
石凌空起飛泉噴雪流山靈莫相競一郡兩瀛州

宿芳村謝氏追和先公留題韻

樹遶芳村路山行復此過人來傷舊雨書法想元和軒
蓋慚先世林泉負宿疴庭蘭諸謝在能誦昔時歌

先襄毅公往歲遊黃山宿芳村謝氏值雨留題今二

十三年矣賤子繼至亦在雨中謝氏諸郎能誦舊詩
不勝感懷步韻一首以識歲月云

黃山觀湯泉及龍池小憇祥符寺

天教微雨淨纖埃重我登臨一度來山姓尚隨軒帝號
詩龕誰繼謫仙才雲扶絳節中天起地拔青蓮四面開
鰲禁半生真浪跡不知鄉國是蓬萊

四山回合駕飛橋似隔雲間萬里遙蜃氣半天浮海市
龍雷平地起風潮雲中鶴叟春鋤藥月下青童夜弄簫

碌碌塵寰成底事却將奇絕付漁樵

怪石如屯虎豹關仙家真在白雲間九州圖蹟誇誰勝
萬古乾坤只此山丹白半餘香冉冉永泉分出水潺潺
手摩蒼蘚看題刻先正高風不可攀

因貪高絕口難名變態分明是化城巨木幾年經魏晉
片雲隨刻送陰晴林開忽見僧堂古嶺盡時逢石棧平
山上雪飛山下雨始疑身世半空行

黃山遊券既償古詩一章與文遠萬里彥夫別

郡推卽告去州將亦辭還勇哉三丈夫追隨入深山屢
衝溪雨寒不畏泥途艱行行抵峰麓劃爾非人寰森森
硃沙泉六六芙蓉鬟塵中五十載一笑開心顏知己正
不多同服同鄉關會當謝纓冕結屋霜林間與子分淨
社覽勝同躋攀相看歲云暮乘此三日閒停盃戒明發
解袂清溪灣

輓富溪族人西疇處士

西疇一夕夢南柯長嘆浮生若逝波龐老定歸耆舊傳

漢庭誰入孝廉科薦新有子悲鮮稻擊壤何人續舊歌
聞說富溪埋玉處才栽松樹已婆娑

帕一方為汪廷器母陳孺人八袞之賀物雖甚
薄然其中有福壽字共三十數祝望之意則
有在也

轉枝花裏織文多持捧高堂愧綺羅福壽共成三十字
憑人添入慶生歌

贈喬尹

寧波喬君以名進士知婺源縣事考績還任過我
山堂疏酌之餘晤言甚洽而君之尊甫迎養在邑
不可留也別後賦此奉寄少見鄙意云

上最初書荷寵光盛年政事古循良沙隄學啟青雲彥
闕里人迎墨綬郎竹葉上堂供拜壽梅花沿路照歸裝
烏臺清切儲名久幾日徵書出建章

李侯新作秋水亭可望松蘿諸山客有遺之沈
石田畫者正會此意

驀地蘿山為寫真石田毫素妙通神間來秋水亭中坐
便是丹青箇裏人

題吳季良所藏戴文進山水

丹青價重錢塘戴一幅湖山寫更工高閣倚空凌夜斗
長橋分水架晴虹勝遊地接呼猿洞舊隱人思放鶴翁
彷彿畫船春載酒綠陰啼鳥路西東

古賢圖四絕為臨塘壻范樟題

伊尹

三聘幡然出有莘畫圖千載見風神南巢草夏桐宮放
豈是臨期促辦人

召平

金貂併與世塵空老圃餘情寄郭東莫笑種瓜生計拙
此心原慕采薇翁

買臣

雪林樵擔壓雙肩士有窮通節自堅贏得馬前愚婦駭
快心堪笑亦堪憐

嚴光

一竿名重子陵灘風景真宜入畫看却恐祿多歸計好
羊裘零落釣磯寒

輓汪道全

嫺黨論交二十秋布衣無競雪盈頭諸生久奉詩書教
幾族能同翰墨儔夢拂梨雲歸海島字摹松雪徧鄉州
哀歌一曲無由致情逐鱖溪水共流

尤美山房

新築幽居掃翠嵐望中林壑勝西南題名借得歐公語
留與漁樵作美談

覽翠亭

孤絕東峰一草亭偶來登眺俯巖局不知眼界寬多少
天外芙蓉萬仞青

葆真軒

白雲深處小開軒手閱南華養太元靜坐不關身外事
任他車馬市塵喧

慕椿為孫文模賦

一樹靈椿大十圍
秋風回首嘆人非
繁陰翠匝行歌地
不忍重看舊舞衣

雨飄風射八千春
一日丹青見樹身
何事人生不如樹
百年腸斷倚廬人

臘月望日至南山治裝北上梅花盛開獨酌花

前悵然有作

手種寒香十八年
盛開長是得春先
江天幾放尊前醉

水月從教畫裏傳正色向予無冷暖繁花隨爾競丹鉛
莫言頭白輕相棄冰雪交情晚更堅

篁墩文集卷九十二